

**Ọkwukwo izi Pọlu
gbaznennu
Ele Galasia
Nhne gbasiri ọkwukwo izi ka**

Hite n'ọpanizo ọkwukwo izi Pọlu gbaznennu ọgbako Chiokike ke zị nụ Galasia, o mernu be mahia nhne lawuru ke zị mkpa. Ke mbom, bu ma be mahia nụ ọ bu ezi nye izi Karaịsi, ke ẹbo bu nụ izi ọma ọ nọokpo okwo a bu ezi ọka. Ka bu kwnornu nụ agida ele badnụ naakaa nụ Pọlu bu nye izi aghalaghala nụ nye nọokpo okwo izi ọma aghalaghala.

Pọlu bu nye izi Karaịsi n'ezi ọka, nye Nyenwe aị nyernu ẹrnu o zni ele buo ele Ju izi ọma. Pọlu kannu Pita nụ ọ bu nye ruwhnu lawuru, kwnornu nụ o kwemana o snornu ele buo ele Ju ele zá naabita Iwu Mozizi ri wiri nga ọ whnurnu ele hi nụ Jeruselem va.

Pọlu kwusiri a rikne nụ okwolem hite n'ọkwnata mkpoma nhne Chiokike jeeji znohia badnụ. Ka whuyaru iwhne nụ budnu Ebereham, nye nahiaru mkwna Chiokike hite n'ọkwnata mkpoma.

Nhne zị n'ọkwukwo izi ka

Ezi nye izi nụ ezi izi ọma (1:1-10)

Chiokike hohiaru Pọlu lele nye izi Karaịsi (1:11-24)

Pọlu naagbanu izi ọma akebne (2:1-21)

Ọznohia kwolem hite n'ọkwnata mkpoma (3:1---4:31)

Ele Enine Nso nụ ọwhnun'anya noodu (5:1---6:10)

Ọdo aka nụ nsni ipne-aznu (6:11-18)

¹ Mawa, Pọlu, nye izi Karaịsi ke híge n'aka badnu mọbu nu rikne ke badnu, kọvu hite nu Jizọsi Karaịsi nu Chiokike Nda, nye mernu Jizọsi hi n'ẹnwu lizọ,

² nu kpakara rumu nda ele me nu be zi naag-baznenu kpakara ọgbako Chiokike ke zi nu Galasia ọkwukwo.

³ Oru nu udno ke Chiokike Nda aị nu ke hi n'aka Nyenwe aị Jizọsi Karaịsi dazinu anu.

⁴ Karaịsi gweru budnu a nyee kwnornu mmehie aị ma ọ dọhia aị n'ige ojo ka lele kpa echiche Chiokike Nda aị pioru.

⁵ Ọznarni zinu a ọkwukokwunu. Amim.

Izi ọma berere zila

⁶ Ọ gbagwojiri m anya nu anu ghasaru nye wam sukwuru anu bna n'oru ke Karaịsi, zne izi ọma berere.

⁷ N'ezi, izi ọma berere zila, kọvu agwna ele badnu naakpahie anu anya, noopio ọ gbanwo izi ọma Karaịsi.

⁸ Kọvu ọ buru aị mọbu enine izi hi n'oligwe va zni anu izi ọma berere ke búo ke a znirni anu, Chiokike vu a ọnu ọkwukokwunu.

⁹ Lele kpa a kwuru nu mbom, m nookwu kwno a berere, ọ buru nu nye ọbula zni anu izi ọma ke zi ichne nu ke anu nahiaru, Chiokike vu a ọnu ọkwukokwunu.

¹⁰ Ka o neegesi nu m noopio ruwhnu ọma ke badnu, búo ke Chiokike? M noopio nhne jaamasị badnu sa? Ọ buru nu m noopio ruwhnu ọma ke badnu, m jọbu nye izi Karaịsi.

Chiokike sukwuru Pọlu

11 Me kanu anu, ru mu nda m, izi o ma me no okpo okwo a buo nhne hi n'aka badnu.

12 M nahiage m a n'aka badnu, o buo badnu znirni m a, kovu Jizosi Kara isi kpumernu a nyee m.

13 Anu nuru kpa me wuru budnu nu mbom n'okpukpe ele Ju, nu kpa me kpaknarnu o gbako Chiokike ehni k'agida, gbalima o whu.

14 M be m ele Ju ibne m osno ele me nu be bu ebiri n'okpukpe ele Ju, m ji m kpakara mkpoma yisi n'omen'eli ele nda a i oknani.

15 Kovu Chiokike bitaru m ichne hite nu ru who nne m, o sukwuru m hite n'oru a. Nga o masiri a,

16 o kpumennu m Nnwọ a, ma m nwernu m rikne zni ele buo ele Ju izi o ma gbasiri a. Ige wam, m znege ma me nu badnu obula tnu otnutnu gbasiri a.

17 M znege m Jeruselem zne o whnu ele be m osno buru ele izi, kovu m znernu m Arebia, m laha Damasikosi.

18 Nga awha eto whemernu, m znernu m Jeruselem zne mahia Pita, me nu a daziri nri nu obochi isne.

19 M whnuge m nye izi berere okwolem Jemisi nwene Nyenwe a i Jizosi.

20 Nhne me gbannu anu n'okwukwo bu ezi oka, Chiokike magwu nu o buo aghalaghala.

21 Omekwo, m zne n'eli ke zi nu rime Siriya nu Silisia.

22 O za nye Kara isi ke zi nu o gbako Chiokike ke zi nu Judiya magwu nye me bu ruwhnu nu ruwhnu.

23 Kovu nu be nuru otnutnu, "Nye wam ke naakpakna a i ehni neezni izi o ma okwnata mkpoma wam o gbaliri o mee ma o whu nu mbom."

24 Be znarnị Chiokike kwnornu m.

2

*Ele izi berere
nabnanyarnu Pọlu*

¹ Nga nri nụ awha ẹno whemernu, m lahna m Jeruselem, me nụ Banabasi, m kwuru Taịtosị zne.

² M znernu m kwnornu nụ Chiokike kpumennu m me zne. N'iznuznu ke me nụ ele risi gbarụ ichne, m kọwaru m izi ọma me znirni ele bụo ele Ju, ọ zị ẹrnu me rnụrnu mọbu ke me nọornu kịtna bọ bụ nhne etekne.

³ Taịtosị nye me nụ a sno, ọ bụ n'ezi nụ ọ bụ nye Giriki, be kwnágidnene a ọ kpa nka.

⁴ Agwna rụmu nda aghalaghala gbebnarnu va o nyosna kpa a jiri nwernu ẹhni aị nụ rime Karaịsị Jizọsị, be pioru ma a bụru ọhi iwu ele Ju.

⁵ A nyége be oghere rịa rịa ma a bịtannu anụ ezi ọka ke izi ọma chịm chịm.

⁶ Agwna ele nụ lele be bụ ele risi. Nhne ọbula be bụ zá m mkpa, kwnornu nụ Chiokike lé badnụ anya nụ ruwhnu n'ikpe. Ọ zá nhne ele ka tụtwasiri nụ izi me znirni.

⁷ Kọvu be whnụrnu nụ Chiokike nyernu m izi ọma me zni ele bụo ele Ju, lele kpa o nyernu Pita ẹrnu o zni ele Ju izi ọma.

⁸ Chiokike wam ke nọornu ẹrnu n'izi ọma Pita znirni ele Ju lele nye izi, bụ masị nye nọornu ẹrnu n'izi ọma me znirni ele bụo ele Ju lele nye izi.

⁹ Nga Jemisi nụ Pita nụ Jọni, ele nụ lele ele risi whnụrnu nụ Chiokike nyernu m ẹrnu ka zị ichne, be gbasịri me nụ Banabasi akarikwnunga

ke neegesi nū a bụ otu. Be kweru a zne zni ele bụo ele Ju izi ọma, be zne zni ele Ju izi ọma.

¹⁰ Nhne be nọorio kpọi bụ, a chenwanya ele mboni, kị bụ nhne me mernu wara wara.

Pọlu bigbọru Pita n'Antiọku

¹¹ Nga Pita vaduru Antiọku, m bigbọru m a nū ruwhnu ọhna kwnornu nū ọ dnahieru.

¹² Sụ ele Jemisi ziyaru va, Pita nū ele bụo ele Ju neeriko wiri. Kọvu nga be vaduru, o kwéle o sno be ri wiri, kwnornu nū ogwnu ele be kparụ nka tūru a.

¹³ Ele Ju ke gwnarnū snornu a kpa ichne ichne kwnornu nū ruwhnu lawuru a, ke kpayaru Ban-abasi sno be nū ruwhnu lawuru be.

¹⁴ Nga me whnurnu nū be méne lele ezi ọka ke izi ọma, m kanụ Pita nū ruwhnu kpakara be, “I bụ nye Ju, kọvu ị noowu bụdnu lele ele bụo ele Ju, ọ bụo lele nye Ju. Ndaa kpa ị naakwnagidne ele bụo ele Ju be snornu omen'ẹli ele Ju?”

Ọznohia bụ hite n'oru

¹⁵ N'ezi, a bụ ele Ju hite n'omumu aị, a bụo ele mmehie lele kpa be nookwu ele bụo ele Ju.

¹⁶ Kọvu a magwụ nū badnū nū Chiokike mernu udno hite n'okwnata mkpọma nū Jizọsi Karaịsi, ọ bụo n'ome nhne iwu kwuru. A kweru nū Karaịsi Jizọsi ma aị nū Chiokike ziri n'udno hite n'okwnata mkpọma nū Karaịsi. Ọ bụo n'ome nhne iwu kwuru, kwnornu nū ọ zá nye ọbula bụ nye ọma hite n'ome nhne iwu kwuru.

¹⁷ Ọ bụru nū nga a noopio ma aị nū Karaịsi ziri n'udno, a whnụ ẹhni aị nū a bụ ele mmehie lele ele

berere, ka o neegesi nū Karaṣi naadaṣi mmehie n'ikwnu? Chiokike kwé.

¹⁸ Ọ bụru nū me paṣo noowu nhne me kw-nadnarnū akwnadna, ka neegesi nū m bụ m nye noolulu iwu.

¹⁹ Kwnornu nū hite n'iwu m nwurnu ẹnwu hne iwu zị, ma m ziri m bụdnū nū rime Chiokike.

²⁰ Be gweru m yisinu Karaṣi kpogidne aṣi n'olu oḡba a, m zá m bụdnū ke m, kovu Karaṣi wu nū rime m. Bụdnū ke me zị n'anọ-ẹhni bụ ke me zị n'okwnata mkpoma ke Nnwọ Chiokike, nye whnurnu m n'anya gweru bụdnū a nyee kwnornu m.

²¹ M zá m neelewhu oru Chiokike anya, kwnornu nū ọ bụru nū ome mma bụ hite n'iwu, ẹnwu Karaṣi nwurnu bụ nhne etekne.

3

Iwu mọbu okwnata mkpoma

¹ Anụ ele Galasia iwahnirniwhno, nyele kpahieru anụ anya? Nū ruwhnu anụ bụ hne me gesiri anụ nū be kpogburu Jizosi Karaṣi n'ogba.

² M pioru m ọ mahia otu nhne n'aka anụ. Anụ nahiaru Enine Nso hite n'ome nhne iwu kwuru, sọbu hite n'okweru nhne anụ nurnu?

³ Anụ bụ ele iwahnirniwhno kpa? Anụ paṣozu n'Enine ke Chiokike, anụ naagbaṣi o wu bụdnū kịtna hite nū rikne ke aka anụ?

⁴ Kpakara awhnụwhnu anụ taru ọ bụ nhne etekne? N'ezi, ọ bụ kwnornu nū nhne etekne?

⁵ Chiokike nyernu anụ Enine a, rnū ẹnū ndu-ẹhni n'esilawuru anụ. Ọ bụ kwnornu nū anụ

mernu nhne iwu kwuru sọbu nụ anụ kweru nhne anụ nurnu?

⁶ Lele kpa Ebereham “kweruru Chiokike, Chiokike gwnusinu a nụ ọ bụ nye mee mma.”

⁷ Anụ mahia nụ kpakara ele nwernu ọkwnata mkpoma bụ rumu Ebereham.

⁸ Ọkwukwo nsọ kwuru nụ hne zị nụ ruwhnu nụ Chiokike jeeme ma ya nụ ele bụo ele Ju ziri n'udno hite n'okwnata mkpoma, znirni Ebereham izi oma, kaa, “Hite nụ rime i, m jọgozi kpakara mba ke ọwa.”

⁹ A whnurnu nụ Chiokike nọgozi kpakara ele ke jeekweru lele kpa Chiokike gọziri Ebereham, nye kweru nụ ya.

¹⁰ Ọvu ọnu zinu kpakara ele neeche nụ Chiokike jọgwnu be lele ele ikpe mana kwnornu nụ be naabita Iwu. Be gbarụ a n'okwukwo nsọ, kaa, “Ọvu ọnu zinu kpakara ele zá naabita kpakara nhne be gbarụ n'Iwu, neeme masị be.”

¹¹ O dnornu aị anya nụ ọ zá nye ya nụ Chiokike zị n'udno hite n'Iwu, kwnornu nụ ọkwukwo nsọ kwuru, “Nye mee mma jeehi n'okwnata mkpoma a ziri bụdnu.”

¹² Kọvu Iwu knóge aka n'okwnata mkpoma, lele kpa ọkwukwo nsọ kwuru, “Nye neeme kpakara nhne ka jaazị bụdnu nụ rime be.”

¹³ Karaịsi gbahiaru aị hite n'aka ọvu ọnu ke iwu, ọ ghonu aị ọvu ọnu. Ọkwukwo nsọ kwuru, “Be vuru nye ọbula be kpokwnusiri n'olu isisi ọnu.”

¹⁴ Karaịsi mernu ka ma ngọzi wam Chiokike kweru Ebereham mkwna bụru ke ele bụo ele Ju hite nụ Karaịsi Jizọsi, ma a hite n'okwnata mkpoma nahoru mkwna Enine Chiokike.

Iwu nụ mkwna

¹⁵ Rụmu nda m, m jeeji nhne anya nọowhnu noogbu esni. Ọ zá nye nwernu rikne o lulu njo-ẹhni badnụ lawuru gbarụ, mọbu tükwasi nhne n'olu a.

¹⁶ Kịtna, Chiokike kweru Ebereham nụ nnwọ a mkwna wam. Ọkwukwo nsọ kwúge agịda rụmu, kọvu “nnwọ ị,” ke bụ otu badnụ, nye bụ Karaịsi.

¹⁷ Nhne me nookwu bụ ka, iwu wam ke be nyernu riwhu awha ẹno nụ nri ẹto kpa mkwna Chiokike kweru Ebereham whemernu, nwée rikne lulu mkwna Chiokike kweru mọbu mee a ọ gharụ ọ zị ire.

¹⁸ Kwnornu nụ ọ bụru nụ nhne okehia ka kno aka n'iwu, ọ buma mkwna, kọvu Chiokike kwnornu n'oru a, o nyernu a Ebereham hite nụ mkwna.

¹⁹ Kịni bụ nhne be kwno nyee iwu? Be nyernu a kwnornu ọdnahie ke badnụ tem dụ nga Nnwọ wam jaava bụ nye mkwna wam nọotu aka. Chiokike nyernu iwu hite n'aka ele enine izi, o nyee a nye ibno.

²⁰ Nye ibno zá mkpa hne otu badnụ zị, Chiokike bụ otu.

²¹ Ka o neegesi nụ iwu megidnenu mkwna Chiokike? Ọza rịa rịa! Kwnornu nụ ọ bụru nụ be nyernu iwu ke jeenye bụdnu, ome mma jọoburu hite n'iwu.

²² Kọvu ọkwukwo nsọ kwuru nụ kpakara ọwa bụ ọhi mmehie, ma nhne Chiokike kweru mkwna o nyee hite n'okwnata mkpọma nụ Jizọsi Karaịsi bụru ke ele kweru ekwe.

²³ Tụtụ sụ ọkwnata mkpọma varụ, a bụ ele ikelu ke iwu, be gbagidnenu aị ọnuhna dụ nga be

kpumernu ọkwnata mkpọma.

²⁴ Iwu wam bụ nye neelegidne aị anya, kwuru aị vakwnusi Karaịsi, ma aị nụ Chiokike zịri n'udno hite n'ọkwnata mkpọma.

²⁵ Kpa ọkwnata mkpọma varu, a zịma nụ mkpururu nye neelegidne aị anya, ke bụ iwu.

A bụ rụmu Chiokike

²⁶ Kpakara anụ bụ rụmu Chiokike hite n'ọkwnata mkpọma nụ Karaịsi Jizọsi.

²⁷ Kpakara anụ ele be wuru mini bna nụ Karaịsi jooworu bụdnu ikne Karaịsi lele iwo.

²⁸ O zá nhne zị ichne nụ hne nye Ju nụ nye Giriki zị, mọbu hne ọhi nụ nye bụo ọhi zị, mọbu hne nyerukna nụ nyerinya zị. Kpakara anụ bụ otu nụ rime Karaịsi Jizọsi.

²⁹ O bụru nụ anụ bụ ele Karaịsi, anụ bụ rụmu Eberham, ele jeekehia mkwna wam Chiokike kweru Eberham.

4

¹ Nhne me nookwu bụ kọriri ka, nye ọbula ke jeeri mkpe nda a hne ọ bụ watakiri, ọ zá nhne zị ichne hne ya nụ nye ọhi zị, ọ bụ n'ezị nụ ya nwe kpakara nhne.

² Ele berere jaazi neelegidne a anya, neezni a nhne, tem dū ige nda a karu.

³ Kpam masi, nga a bụ rụmu takiri, a bụ ọhi renwu ojo matị matị ke ọwa.

⁴ Kọvu nga ige dūru, Chiokike ziyaru Nnwọ a, nye nyerinya murnu nụ mkpururu Iwu Mozizi,

⁵ ma ọ gbahia ele zị nụ mkpururu iwu, ma a bụru rụmu Chiokike.

⁶ Kwnornu nụ anụ bu rụmu a, Chiokike ziyaru Enine Nnwọ a nụ rime mkpọma aị, Enine ke naakwna, “Papa, Nda m.”

⁷ Kam kpayarụ ị búma ọhi, kọvu nnwọ, hne ị bu nnwọ, Chiokike mernu ị bụru nye jeeri mkpe a.

Nhne meturu Pọlu nụ mkpọma

⁸ Nụ mbọm, nga anụ máa Chiokike, anụ bu ọhi nhne búo chi.

⁹ Kọvu kịtna, anụ magwụ Chiokike, mọbu Chiokike magwụ anụ. Ndaa kpa anụ jaalahnakwnusi renwu ojo matị matị ke nwée rikne, ọ zá nhne be ji be neeme? Kịni kpayarụ anụ jọoburu kwno ọhi be berere?

¹⁰ Kịni kpayarụ anụ naabita ọbochi zị ichne, ma ẹnwa, ma ige nụ awha?

¹¹ Ogwnu anụ nọtụ m. Ọ jọobu nụ ẹnu m nụ risi anụ bu nhne etekne sa?

¹² Rụmu nda m, m naariasno anụ, anụ nụ lele me, m nụ m lele anụ ele búo ele Ju. Ọ zá nhne ojo ọbula anụ mernu m nga me znirni anụ izi ọma nụ mbọm.

¹³ Anụ chenwanya ọ bu ẹhni igbugbu mernu me daziri zni anụ izi ọma nụ mbọm.

¹⁴ Ọ bu n'ezi nụ ẹhni igbugbu m bunnu anụ nhne ọrnurna, anụ lédnage m anya mọbu zusa m. Kọvu anụ kwubnanyarnu m lele nụ m bu m enine izi Chiokike, lele nụ m bu m Karaịsi Jizọsi n'iwhuru a.

¹⁵ Kịni mernu ovu ọso n'ọnu ke anụ nwernu nụ mbọm? M jaagbanu anụ akebne, ọ bụru nụ ọ kweru o mee, anụ znernu ahnahia mkpuru anya anụ lawuru chita m be.

16 M gholá nye irno anụ kwnornu nụ m kannụ m anụ ezi ọka sa?

17 Kpakara ele neegesi nụ nhne gbasiri anụ neemetu be nụ mkpoma, be zá neeme a kwnornu nhne oma anụ. Nhne be noopio bu ma be gweme anụ hne a zi, ma anụ menu be kpa be neemenu anụ.

18 O buru oma o gweru mkpoma anụ neeme nhne buru oma ige obula, o buo nga me nụ anụ zi kpoi.

19 Rumu takiri m, ele rime neeme m kwnornu be lele kpa rime neeme nyerinya nomu nnwo. M zi m nụ nhne igbugbu ka tem oiyi Karaisi ziri nụ rime anụ.

20 O kanu m mma o buru nụ me nụ anụ zi kitna, m zneru m amahia kpa me zneru obita onu kwunu anụ oka. Kwnornu nụ mkpoma naala m mini hne anụ zi.

Haga nụ Sera

21 Anụ kanu m, anụ ele noopio o zi nụ mkpururu iwu, anụ máa nhne iwu wam kwuru?

22 Kwnornu nụ be gbaru a n'okwukwo nsọ, kaa nụ Eberham nwernu rumu rukna lawuru, nnwerne ohi murnu otu, nnwerne ke buo ohi murnu ke berere.

23 Nnwọ ke nnwerne ohi murnu bu ke o murnu kpa be murnu ele berere. Kovu nnwọ ke nnwerne ke buo ohi murnu bu nnwọ Chiokike kweru mkwna a.

24 Ka bu nhne oma atụ, ele rinya lawuru ka bu ogba-njo-ehni lawuru. Otu bu Haga, ke hi nụ rugwu Saina, nye rumu a bu ele ohi.

²⁵ Haga nụ lele rugwu Saina ke zị nụ Arebia, ọ nụ kwno lele ẹli Jeruselem tna, ke ya nụ kpakara rụmu a bu ọhi nụ mkpururu iwu.

²⁶ Kọvu Jeruselem ke zị n'olu búo ọhi, ọ bu nne aị.

²⁷ Kwnornu nụ be gbarụ a n'okwukwo nsọ, kaa, “Nwudna, jị nyerinya ke nwée nnwọ, jị nye múge nnwọ, gweru okne nkọli siwama lulo, mkpoma so ị n'onu, jị nye rime nnwọ mélele, kwnornu nụ nyerinya ke be ghasarụ jeenwe agida rụmu, kakwo nyerinya ke nwernu nzi.”

²⁸ Kịtna, rụmu nda m, lele Aziki, anụ bu rụmu Chiokike kweru nụ mkwna.

²⁹ N'ige wam, nnwọ wam be mụrnu lele kpa be mụrnu ele berere kpaknarnu nnwọ wam be mụrnu hite nụ rikne Enine ẹhni. O zị kọriri kpam kịtna.

³⁰ Kọvu kịni bu nhne okwukwo nsọ kwuru? “Chihala ọhi nyerinya wam nụ nnwọ a, kwnornu nụ nnwọ nnwerne ọhi nụ nnwọ nnwerne ke búo ọhi jéeri otu mkpe.”

³¹ Ke bu nụ, rụmu nda m, a búo rụmu nnwerne ọhi, kọvu a bu rụmu nnwerne ke búo ọhi.

5

A nwernu ẹhni aị nụ rime Karaịsi

¹ Karaịsi mernu a nwernu ẹhni aị. Kam kpayarụ, anụ gwuzosi rikne, anụ kwé anụ buru kwno ọhi berere.

² Anụ bnote nsni, mawa Pọlu naakanụ anụ, anụ kwé be kpa anụ nka, kwnornu nụ anụ mee kpa, ọ zá mbnarna Karaịsi bnannụ anụ rịa rịa.

³ Me kwu kwno a berere, nye ọbula ke kweru be kpa a nka jaabitariri kpakara iwu.

⁴ Anụ ele noopio be nụ Chiokike ziri n'udno hite n'iwu, anụ kewahalaru ẹhni anụ hne Karaịsi zi. Anụ zima n'oru Chiokike.

⁵ Kọvu a neele anya nụ aị nụ Chiokike jaazi n'udno hite n'okwnata ovu. Ka bụ nhne a neese hite n'Enine.

⁶ Kwnornu nụ rime Karaịsi Jizọsi, ọ zá nhne zi ichne nụ ọkpa nka nụ ọkpáge nka, kọvu ọkwnata ovu aị ke nọornu ẹnu n'ọwhnun'anya bụ nhne zi mkpa.

⁷ Anụ neemekwa nkari nụ mbom, nyele kpahieru anụ anya, kaa, anụ bnó nsni nhne ezi ọka nookwu?

⁸ Nhne nụ kpa híge n'aka nye wam sukwuru anụ.

⁹ “Nhne whụ brẹdi matị neeme kpakara brẹdi whụ ọwhu.”

¹⁰ M tükwasiri m Nyenwe aị mkpoma nụ anụ jéekwe anya hie anụ, anụ mee nhne berere. Kọvu nye ọbula ke naakpakna anụ ẹhni jeeri nhne ọ kpasiri, nye ọ masiri a ọ bụru.

¹¹ Rumu nda m, ọ bụru nụ m zi kọriri m neezni nụ ọkpa nka zi mkpa, kini kpayarụ be naakpakna m ẹhni? Ọ bụru nụ m zi m nookwu nụ ọkpa nka zi mkpa, izi gbasiri ọgba Karaịsi jọoburu rugwu ọkpobi ọchi.

¹² Ọ jaamasị m ọ bụru nụ ele wam naakpakna anụ ẹhni jọowhoga, mee ẹhni be okiri badnụ.

¹³ Rumu nda m, Chiokike sukwuru anụ bụru ele nwernu ẹhni be. Kọvu anụ kwékwadia ọ nwernu

ẹhni anụ mee, anụ mee nhne anọ-ẹhni anụ noopio. Kọvu anụ gweru ọwhnun'anya znenu ibne anụ ịzi.

¹⁴ Kpakara nhne be nyernu n'iwu chikotaru risi n'otu nhne ka, “Ịjọowhnu nye agbatibi i n'anya, lele ẹhni ị.”

¹⁵ Ọ bụru nụ anụ jaazi naatagbu, nọdoka ibne anụ, anya dụ anụ ẹli ọ zị anụ gbukwo ẹhni anụ.

Anụ kweru Enine nẹchi anụ

¹⁶ Nhne me naakaa bụ ka, anụ wuru bụdnu n'Enine, anụ jéemezu nhne anọ-ẹhni noopio.

¹⁷ Kwnornu nụ nhne anọ-ẹhni noopio neemegidne nhne Enine Chiokike noopio. Nhne Enine Chiokike noopio neemegidne nhne anọ-ẹhni noopio. Be neemegidne ibne be, anụ gharu o mee nhne anụ noopio.

¹⁸ Kọvu, ọ bụru nụ Enine noodu anụ, anụ zá nụ mkpururu iwu.

¹⁹ Ẹrnu ke anọ-ẹhni whụyaru iwihne, ke bụ, ome ọyi, ọgba ikoro, nhne zila rịchna,

²⁰ ọkwa rẹnwu nụ amusu, irno, ọlu ọgwnu, ọkpa ichne ichne, okwno-awụwa, ọnuma, aka-nchni, ọbna otu,

²¹ ọwho-anya, okne manya, okne otne eri, nụ nhne nụ kpa. Ka bụ nhne me nọdọ anụ aka nụ nsni kịtna, lele kpa me dọru anụ nụ mbom, kaa nụ ele neeme nhne nụ kpa, jéekhia igwe n'ẹli-eze Chiokike.

²² Kọvu mkpuru ke Enine neegweya bụ ọwhnun'anya, snarnima, udno, ndidi, ovu ọma, ọburu ọma, okwesi ọkwnata mkpoma,

²³ ọzi wọhnerne, badnu nwụkwaru ẹhni a, ọ zá iwu ke megidnenu nhne nụ kpa.

²⁴ Ele ke Karaïsi Jizõsi bu ele gweru anõ-ehni be nu nhne nõogwnu be kpõgidne n'olu õgba.

²⁵ O buru nu a zi budnu nu rime Enine, ngwa ma a zne izne nu rime Enine.

²⁶ Ngwa ma a gharu oknomokno, gharu naak-pasu ibne ai ovu owe ehni, gharu enwe owho-anya hne ibne ai zi.

6

A vurita ivu ibne ai

¹ Rumu nda m, o buru nu badnu obula mee mme-hie, anu ele gwuzosiri rikne nu rime enine gweru wõhnernerne znikwata a nkari. Anya du masi anu eli, o zi anu dnabna n'ornurna.

² Anu vurita ivu ibne anu. O buru nu anu neeme kpm, anu jeemezu iwu Karaïsi.

³ O buru nu badnu obula neeche nu o bu nhne nga o za nhne o bu, o nooduwhu ehni a.

⁴ Nye obula tule ernu a, ige wam, o jeenwe rikne mee oknomokno n'ernu a. O za nye ji ernu a tu n'ernu nye berere,

⁵ kwnornu nu nye obula jõornu ernu zinu a.

⁶ Nye obula be znirni izi oma ke Karaïsi whnu nu ya nu nye znirni a nhne kehjaru nhne buru oma.

⁷ Anu duwhu ehni anu. Kwnornu nu o za nye jõokpoli Chiokike mgbai. Mkpuru obula badnu kpasiri bu nhne o jõoghoru.

⁸ Nye obula ke kparu mkpuru n'anõ-ehni a, jeehite n'anõ-ehni a ghõru enwu, kovu nye kparu mkpuru n'Enine, jeehi n'Enine a ghõru budnu kwõ okwo lele mkpuru.

⁹ Anụ kwéko rikne gwụ anụ n'ome nhne bụru ọma, kwnornu nụ ige vawa nga a jọoghoru mkpuru, ọ bụru nụ rikne gwúge aị.

¹⁰ Kam kpayarụ, lele kpa a nwernu oghere, a ziri neemenu kpakara ele badnụ nhne bụru ọma, ke kakwo, ele zị n'ezinụ-oro ke ọkwnata mkpoma.

Ọdo aka nụ nsị ipne-aznụ

¹¹ Kịtna, m jị m aka m naagba ọkwukwo izi. Le kpa mkpuru ọkwukwo me naagba hna ezi.

¹² Ele neeme oknomokno n'anọ-ehni bụ ele naakaa be kpa anụ nka. Ka bụ ma be gharụ ọ kpakna be ehni kwnornu ẹnwu n'ogba Karaịsi.

¹³ Ọ bụbedi be ele be kparụ nka zá naabita iwu. Be noopio be kpa anụ nka ma be mee oknomokno nụ nhne zị n'anọ-ehni anụ.

¹⁴ Chiokike kwéko me mee oknomokno hne ọ bụo n'ogba Nyenwe aị Jizosi Karaịsi, nye be kwnornu ehni a kpogidne ọwa n'ogba hne me zị, kpogidne masị m n'ogba hne ọwa zị.

¹⁵ Kwnornu nụ ọkpa nka nụ ọkpáge nka bụo nhne. Nhne bụ nhne bụ bụdnu ikne.

¹⁶ Udno nụ obirizi zinu kpakara ele noosno iwu ka nụ bụdnu be, be nụ kpakara ele bụ Izireli ke Chiokike.

¹⁷ Hite kịtna zne ruwhnu, ọ zá nye kpakna m ehni berere, kwnornu nụ m vu m n'ehni m ẹnya ke neegesi nụ m bụ m nye izi Jizosi.

¹⁸ Rumu nda m, oru ke Nyenwe aị Jizosi Karaịsi dazinu enine anụ. Amim.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89